

Ils Tuatschins dattan gas

Igl Express solar ei arrivaus, silmeins inaga ella Val Tujetsch, nua che l'interpresa Energia Alpina ha envidau alla tschentada dil crap da fundament per l'empresa ovra solara gronda en Svizra. In gi da satisfacziun per il tgamun dalla interpresa ch'ei vinavon ferm perschuadius da reussir.

ANDREAS CADONAU/FMR

Bia satisfacziun han ins sentiu il vendergis vargau a Schlarignas/Cuolm Val tiel tgamun dalla interpresa Energia Alpina. L'interpresa en possess dalla vischnaunca da Tujetsch s'engascha en empresa lingia per furnir electricitad alla populaziun dalla val. Energia Alpina ha envidau cun siu partenari da project alla tschentada dils craps da fundament. Metter en pei in project enteifer strusch dus onns ei bein stau, tenor il president dil cussegl d'administraziun

«Nus essan perschuadi ch'ei gartegia.»

Claudio Deplazes,
president cussegl d'administraziun

Claudio Deplazes: «In act da forza» Tonpli leds eis el sco tut ils involvai da prest entscheiver cun la construcziun dalla ovra da buca meins che 5700 meisas solaras che produceschan tenor plan current per 6500 casadas e quei bunamein per la mesadad duront igl unviern. Per retscheiver la contribuziun dalla Confederaziun da 60% als cuosts d'investiziun dad 85 milliuns francs sto igl emprem current flessegiar ella reit gia la fin digl onn 2025. Claudio Deplazes ei da buna fei. «Nus essan perschuadi che quei gartegia.»

Pagina 4



Sedrun solar a caschun dalla tschentada dil crap da fundament. Quella equipa sefatschenta vinavon intensiv cun l'ovra solara gronda ella Val Tujetsch.

FOTO ERVIN MONN

Levada da Sedrun solar

Igl express solar instradaus il settember 2022 dil parlament federal semetta en moviment. Silmeins ella vischnaunca da Tujetsch nua che l'interpresa indigena Energia Alpina ha envidau il vendergis vargau alla tschentada dil crap da fundament per l'emprema ovra solara gronda en Svizra. In gi legrevel per la vischnaunca e las interpresas involucadas.

ANDREAS CADONAU/FMR

Buca sulet ina ga ei il plaid «plascher» curdaus il vendergis vargau a Schlarignas/Cuolm Val sin varga 2000 meters sur mar sin intschesch dalla vischnaunca da Tujetsch. Envidau al segn da partenza per l'ovra solara gronda en quei liug ha Energia Alpina, l'interpresa responsabla per il provediment d'electricitad dalla vischnaunca da Tujetsch. Il president dil cussegl d'administrasiun dad Energia Alpina, *Claudio Deplazes* ha discurrei dad in «act da forza» da metter en pei il project solar. «Nus essan denton perschua di ch'ei gartegia.»

Gartegia da realisar in indrez cun 5700 meisas solaras che cuarclan ina surfatscha da 0,3 kilometers

quadrats. Ina investiziun che cuosta buca meins che 85 milliuns francs. Per dumignar las investiziuns ha Energia Alpina anflau ella interpresa Aventron ina partenari. Ina interpresa cun sedia el cantun Basilea campagna che posseda e meina, tenor atgnas indicaziuns, en l'entira Europa buca meins che 300 ovras che produceschan energia regenerabla.

Per realisar e menar l'ovra solara scuffleschan las duas interpresas ina nova societad acziunara sco partenaris eguals, sco quei ch'ins ha pudiu endriescher il vendergis vargau a caschun dalla tschentada dils craps da fundament. L'interpresa Energia Alpina mantegn denton in ferm plaid ella nova societad acziunara cun il dretg sin la decisiun da tagl. Sch'ina decisiun ella nova interpresa ei pari astga l'Energia Alpina decider.

«Quei projet ei in muossavia»

Presents alla tschentada dil crap da fundament a Schlarignas/Cuolm Val ei era il meinafatschenta da Avaton, *Eric Wagner* staus. El ha discurrei dad ina honur per sia interpresa dad esser dalla partida tier in projet da tala impurtonza. «Quei project ei in muossavia per auters semeglients projects en Svizra», ha *Eric Wangner* puntuau. Ed el ha era menziunau la buna collaboraziun ton cun la interpresa indigena sco cun la vischnaunca tuatschina. «Ussa entscheiva ina fasa da construcziun dalla ovra e quella fasa cuntegn aunc ina ni l'autra sfida.»

Il president communal *Martin Cavegn* ha mussau vi da tschella vart dalla val sin il lag da ferma da Curnera e menziunau la veglia dalla

vischnaunca e dalla populaziun da Tujetsch da s'engaschar ella produzioni d'energia e quei gia avon decennis. «Per scaffir e mantener la basa d'existenza ella val.»

E scochemai entscheivan las lavurs da construcziun, sco quei ch'il meinafatschenta dad Energia Alpina, *Ciril Deplazes*, ha tradiu il vendergis vargau (mira sutvart). Sin la fin digl onn 2025 sto 10 % dalla produzioni da Sedrun Solar flessegiar per ch'il projet possi profitar dallas subvenziuns federalas. Entochen igl onn 2028 ei previu da metter en funcziun tec a tec l'entira ovra solara. Sper Sedrun solar han aunc duas ulteriuras ovras solaras grondas retschert dil cantun Grischun la lubientscha da construcziun.

«Nus dumignein quei»

(fmr/ac) Il segn da partenza per Sedrun solar ei per el ina gronda satisfaziun. Al meinafatschenta e sia equipa dalla pintga interpresa Energia Alpina eis ei reussiu da metter en pei in project solar grond, ferton ch'ils gronds dalla branscha han tscheu e leu fadigia.

Ciril Deplazes ei perschua di che Sedrun solar daventi ina historia da success che porti plivalur alla val.

FMR: *Ciril Deplazes, Vies president dil cussegl d'administrasiun sco il president communal han oz a caschun dalla emprema badelada tshintschau dad in gi da plascher, co vesa il meinafatschenta quei gi?*

Ciril Deplazes: Gie, oz ei in fetg bien di. Per mei eis ei secapescha impurtont che tut gartegi. Igl ei stau in temps intensiv ed ussa eis ei tuttina aschi lunsch.

Tgei han Ciril Deplazes e sia Energia Alpina fatg meglier che Vos essas l'emprema ovra solara gronda che va en construcziun en Svizra?

Jeu creigel che pliras caussas ein impurtontas. Ina segir il liug ch'ei optimal. L'equipa davostier che ha luvrau vid quei project ei medemamen ina fetg buna equipa. Cun la dretga gliud el dretg liug damognan ins in tal project.

E Vos haveis era la populaziun che stat davos quei project. Daco ein ils Tuatschins aviarts per in tal projects, en auters logbens ha ei gie dau massiva opposiziun?

Nus havein sviluppuar nies project digl intern anoviars. Tier nus ei buc ina interpresa d'ordvart vegnida cun in project e mess quel sin meisa. Quei ei probabel stau il pli decisiv.

E la Energia Alpina ei ina interpresa tuatschina?



Il meinafatschenta dad Energia Alpina, **Ciril Deplazes**.

FOTO ERVIN MONN

Gie, ella ei per 100 % en possess dalla vischnaunca da Tujetsch.

Sviluppar e baghegiar ina tala ovra ei ina causa, tgei porta quella ovra alla interpresa enaquella ch'ella ein en funcziun?

Nus havein in partenari che pren giu l'energia sur in liung temps per in prezi fix. Aschia che nus sa-vein gir che quei project renda. Schiglioc baghegiassen nus buca quei project.

Eric Wagner, il schef dad Avatron l'interpresa partenaria, ha oz tshintschau dad entginas sfidas che seigien proximamein da dumignar. Da tgei sfidas setracta ei?

Che l'entira logistica el liug da construcziun funcziuneschi e che nus vegnin da tener en ils termin. Jeu vai denton negins dubis che nus dumignein quellas sfidas.

Lavur che mereta respect

ANDREAS CADONAU/FMR

Avon beingleiti dus onns ha il parlament federal mess sin via igl Express solar e dapi lu ha ei dau dabia debattas controversas e beinenqual project ha aschi spert anflau la via el canaster da pupi sco el ei staus sin meisa. Che l'ovra solara iniziada dalla interpresa Energia Alpina ha astgau dar il vendergis vargau igl emprem segn

da partenza per realisar ina ovra solara gronda en Svizra mereta respect. Tonpli ch'ei setracta dad ina interpresa locala cun meins che 30 employadas ed employai che s'engascha primarmein da furnir electricitad alla populaziun tuatschina.

Ferton che biars han discutau, han ils Tuatschins luvrau e la populaziun ha da biall'entschatta purtau l'ovra solara gronda. Las

organisaziuns per la protecziun dalla natira han para seschau perschuader da desister da recuors. Bein surpren la Confederaziun entochen 60 % dils cuosts d'investiziun, sch'igl emprem current spigenta la reit sil termin fixau. Tier ina summa d'investiziun dad 85 milliuns francs resta denton aunc avunda resca. Cun l'interpresa Aventron han ils Tuatschins anflau ina partenari che para da posseder

dabia experienza cun producir energia regenerabla. Persuls selai in tal projet buca realisar, quei ei clar.

Il vendergis vargau han il tgamun dalla Energia Alpina e lur partenaris buca sulet catschau la pala el terren per far ina biala fotografia. Els han tschentaun quater craps da fundament. E sin quei fundament vulan els realisar lur ovra. Il president communal Martin Cavegn

ha mussau cul bratsch en direcziun dil lag da fermada Curnera da tschella vart dalla val e regurdau alla tradiziun tuatschina da s'engaschar per la producziun da current. Ils lags da fermada ella vischinonza s'audan denton als concerns gronds, ina buna part dil gudogn da quellas ovras resta ella Bassa. Quella ga vulan ils Tuatschins tener las hottas els agens mauns, gia quella tenuta mereta respect.